

Festival di Dande awe nochi ta dedica na Dotty Boekhout



RUDOLF "Dotty" Boekhout, legendario tocador di acordeon, y cu mas di 40 aña a pasa cu paranda di dande den tur distrito di nos isla cu e mes grupo cu el a cuminza toca cune for di 1944 y despues toca cu varios grupo mas, ta wordo homenagea cu Festival di Dande 2008.

Un dia Juan Lampe d.f.m. a acerca Dotty pa compaña nan cu nan grupo tocando acordeon. Despues Dotty a toca cu Nady y su grupo y pa Pampi Suarez y hopi agrupacion mas, principalmente paranda di Dande. E ultimo paranda di dande cu el a pasa tabata cu Nadi Dijkhoff y su grupo. Dotty a toca cu Los "Bigotes di Coby Ras.

El a siña dor di mira con sr. Fio tabata toca acordeon. Pa 75 florin el a compra un acordeon y den tempo cortico ya e por a saca cantica rib e acordillo y despues di hopi practica el a domina acordeon completamente.

El a toca na La Cabana pa 11 luna largo, toca hopi bruid fiesta di aña casa, ricibimento y fiestanan priva di famia. El a toca Dera Gay, Festivalnan di Dande y varios otro festival.

El a toca en e prome festival di dande na 1973 na Connie Francis club hunto cu su ruman Elio Boekhout d.f.m.

Dotty ta yiu di Carlino y Bonifacia Boekhout di Paradera y e pareha dichoso a ser bendicon cu 11 yiu.

Dotty a casa na 1931 cu srta. Juanita Vrolijk, tambe di Paradera y e pareha a ser bendicion cu 5 yiu, 3 yiu muher y 2 yiu homber. E tin un yiu muher na Hulanda actualmente.

Di su 5 yiunan, ningun ta toca instrumento. Ta su yiu mayor (Ludi) a cuminza toca acordeon, pero despues a lague un banda tambe. Tur yiu a bira baliador si.

Ademas di a toca dande pa varios grupo, Dotty a acompaña tambe hopi cantante di Dande. Na 1999 el a acompaña Roberto Orman pa un CD.

Dotty a splica tambe con cantantenan di Dande ta keda hopi dia sin stem. Su ruman Elio mes ta keda completamente sin stem. Di su rumannan ningun tabata musico tampoco. Elio y difunto Cobito tabata cantante.

Dotty a splica cu e dande mes ta termina dia di Tres Rey.

E Festival di Dande di e aña aki ta dedica na su persona. Sigur e merece y pabien for di awe di AWE**Mainta**.

Tur agrupacion y cantante ta cla p'e Festival di Dande



ULTIMO toke p'e festival tipico, propio composición y dande a tuma lugar y por bisa cu tur agrupación musical ta prácticamente cla p'e festival cu lo tuma awe diasabra 27 di december den Club Sport Boys na Angoshi. Manera ta conoci e festival lo ser dedica na e legendario tocador di acordeon sr. Dotty Boekhout.

E festival lo cuminsa pa 7'or di anochi cu e prome agrupación Tipico Sobrenitos cu Himno di Aruba y su cantante di dande Uka Hernandez.

Grupo Alegre lo sigui cu un cancion tipico, un propio composición y 6 dande, Tano Carrion, Tony Werleman, Francis Jacobs, Ludy Werleman, Angeline Henriquez y Francela Jacobs.

Tipico Ban Uni lo tin como cantante di dande Eddy Geerman y un cancion tipico.

Tipico Macuarima tin un dande

den voz di Fernando Dirksen, un tipico y un propio composición.

Tipico IPATUR tin un dande canta pa Maya Croes y un cancion tipico. Tipico Arubano lo sigui cu 3 dande, Jersiray Werleman, Mario Croes y Helen Flanegin Arends, un cancion tipico. Los Hermanos lo sigui cu un dande, un tipico. Tipico Madu lo sigui cu 2 propio composición, un tipico y un dande canta pa Marlon Maduro.

Jossy y su grupo lo sigui cu un cancion tipico, un propio composición canta pa Beatrix, dandenan canta pa Tico Petrochi y Roberto Orman. Grupo di Betico cu 2 dande canta pa Eric Ras y Jeffrey Kelly, un cancion tipico y un propio composición.

La Bomba cu un cansion tipico, un propio composición y 5 dande; cantantenan Catherine de Cuba, Casey Dozier,

Derrick Dabian, Omar Kock, Rupirupi Croes y Susy Kock. Tipico Perla cu dos cantante di dande; Frank Kock y Ronwayn Kock, un cancion tipico y un propio composición.

Tico y su Estreyanan lo sigui cu un cancion tipico; y 4 propio composición y 2 dande canta pa Chinto Croes y Hubert Geerman.

Robert Maduro y Alma Folklorico cu 5 dande, Maria Geerman, Mario Luidens, Jair Boekhoudt, Roderick Franken y Daisiree Carrion, un cancion tipico y un propio composición. Frenk Croes y su Tipico Pegasaya cu un cancion tipico, un propio composición y cuatro dande; Luigi Carrion, Benjomar Paneflek, Danilo Vrolijk y Jelissee Boekhoudt. Paranda Ta Nos cu un tipico dos dande canta pa Crispina Boekhoudt y Jair Boekhoudt.